

宋·鄭汝諧撰

易學叢
書續編

東谷易翼傳

廣文書局印行

中華民國六十三年九月初版

易學叢
書續編

東谷易翼傳

裝精全一冊定價新台幣：一百八拾元

版權
所有
不准
翻印

撰者 鄭

汝 諧

發行人 王

道 榮

發行所

廣文書局有限公司

經銷者

全國各大書局

臺北市羅斯福路二段九號之三
郵政劃撥二一九九號
電話三四九六六〇號

內政部出版業登記證內版台業字第一三二四號

東谷鄭先生易翼傳序

易之敎失而爲卜筮之書以流於陰陽占驗之術王輔嗣曰互猶不足遂及卦變變又不足推致五行一失其原巧愈彌甚故其註易常務明理自謂有得於言象之表然其失也祖述老莊謂有從無出理寓於無易以垂敎本備於有是知有無之截然爲兩而不知體用一源顯微無間之原無二致也於是心迹始判學術事功紛然駁雜矣或者不安於淺近而徒索之於無其弊也不至糟粕詩書土苴仁義不止程氏有憂之作爲易傳一以玩辭爲主其言曰得於辭不達其意者有矣未有不得於辭而能通其意者也故

不涉於象數象與占在其中矣不落於有無性命幽明之理著事物情盡而開物成務之道備矣朱子謂其用意精密道理平正尚疑其舉三百八十四爻盡屬之於人身於作易之意有所未盡且其間義理多伊川所自發與經文隔膜所以讀者難於貫穿而程子亦自云成書旋復脩補期於七十其書始出又曰吾於此書止說得七分後人更須自體究其不敢自信如此此東谷鄭氏舜舉翼使之所以作也舜舉自序其所得於伊川者由體用顯微之旨而於其中猶不能以無疑疑斯辨辨斯明凡伊川之隱而未發者莫不嘗其窾綮盡其節目融會貫通而出之然後確

乎其有以自得也夫明經者必博觀衆家之說折衷
其是以定一宗故其理可明而異說不得以惑則是
書之作雖不足以盡易其有功於易也多矣況於程
氏之書也哉予故特梓之以廣其傳

康熙丙辰納蘭成德容若序

古今傳易者多矣至河南程氏始屏諸家艱深之說而析之以明白簡易之理一時學者知所師承如瞽者之明如瞶者之聰如偃偃於冥涂者識其所趨猗與盛哉汝諧伏讀其書而邇其所得者曰體用一源顯微無間也學者不得此理而謂得三聖之心皆妄也何者易精微之書也然聖人所以仁天下來世者欲其皆可知皆可從至其精微者則存乎人之自得爾非以其艱深者而眩其入也世之傳易者實不得乎精微之旨慮其凡近之易忽也乃委之於象數彙恍之中而立於不可詰之地援怪以爲艱指迂以爲深幸其一說之合則其所不合者挽而傳致之學

者駭其然而求其入也疲心剋精以志於得既得之於道無補也於聖人仁天下之心無與也蓋舉體而遺用則非體徇微而廢顯則非微汝諧每念聖人之經得程氏而始昭昭於天下不敢以他說亂之慮其雜也不敢以己見先之慮其偏也信之篤故其思深思之深故或因程氏而有得者夫信之足矣因之而有得何也誠然之理取則於吾心心之所安者信之其所未安者疑之疑斯辯辯斯明矣謂其爲程氏而亦信其所未安者命之曰欺非心學也乃以程氏之說疏於經之左程氏有所未及與及之而未明凡可傳以己意者則題以爲翼傳私竊識之非敢並駕其

說也其在睽曰君子以同而異同異之相形也猶水火之相滅而相成也同而不異則喪其所以爲同矣此書非立異於程氏也祇以爲同也古括鄭汝諧序余始作翼傳以程氏之說繫於經之下而以翼傳繫於程氏之下部帙太繁今於諸卦盡用程氏傳者題曰從程氏其附以翼傳者曰餘從程氏所以尊河南之學而示無去取之義也

東谷鄭先生易翼傳上經

乾



乾上

乾元亨利貞

翼傳曰易始於天地而曰乾坤天地其位也乾坤其義也曰天地則涉於有形曰乾坤則知天地之所以爲天地矣繫辭曰乾坤毀則無以見易易不可見則乾坤或幾乎息矣乾坤果何物也道無乎不在乾坤亦無乎不在一物一事具一乾坤近取諸身乾坤在焉一動乾也一息坤也一噓乾也一吸坤也動息噓吸相因相生未始間斷此乾坤之所以爲乾坤而易之所以爲易也故曰天地設位

而易行乎其中矣易非獨謂此書也通上下亘古今無終始無前後而是理未嘗息是之謂易能悟此理則易無餘蘊矣餘從程氏

初九潛龍勿用

翼傳曰陽九陰六說者不一或者取河圖爲證謂六爲純陰過六則一陽生矣夫以六爲純陰可也以九爲純陽則不可蓋河圖以九位乎離至離而一陰已生矣然則九六之義安在乎曰說卦固言之矣而學者弗之攷也曰昔者聖人之作易也幽贊於神明而生蓍參天兩地而倚數參天兩地非九六乎數始於一而至於五備矣自五以往皆配

合以成者故一得五而成六二得五而成七三得五而成八四得五而成九五五偶而成十河圖之中宮以五位焉所以管攝是數也聖人於五數之中而用一三五之奇數爲九參天也用二四之偶數爲六兩地也五散而爲九六而九六固已行乎五之中矣此自然之理而說卦之所言也學者多其說以求之亦過矣

九二見龍在田利見大人

翼傳曰龍潛則在淵飛則在天二曰見龍在田田豈龍之所安處哉二居下體之中君德也五居上體之中君位也君德著聞而天下利見聖人非敢

以是自安也故曰見龍在田時舍也時舍者非久
安之地也不言吉凶悔吝者在德則爲正中在天
下則爲文明其事則吉其心則非所安也耕者歸
舜則去之而漁漁者歸之則去之而陶懼名之我
歸畏天下之我從也書曰玄德升聞乃命以位立
幽潛也舜之本心也升聞見龍也舜之不得已也
此理至微故以在田爲言

九三君子終日乾乾夕惕若厲无咎

翼傳曰三居下體之上過乎中也不曰龍而曰君子龍非可以常健也能飛能蟄是以變化不測三陽位之不中者而以九居之蓋乾而又乾龍无此

義也惟君子用之以進修不懈日夕惕懼則雖危而无咎

九四或躍在淵无咎

翼傳曰重剛而不中三與四同也三之无咎其辭詳而危四之无咎其辭簡而平三下體而未離乎下乾道之未革也其進退之際得失甚重故必終日乾乾夕而惕若然後无咎四上體而已趨於上乾道之已革也既進而無退處得而鮮失惟擇其所安者而從之則可以无咎王弼曰凡言无咎者本有咎也防得其道則无咎餘從程氏

九五飛龍在天利見大人

翼傳曰五進乎天位不知其然而然者聖人之心
豈利天下而爲之固天下之所利見也餘從程氏
上九亢龍有悔

從程氏

用九見羣龍无首吉

翼傳曰六十四卦之九六其用如是莫大於乾坤
爾見識也識得羣龍之義惟无首則吉也以龍德
爲首則是先天下而起也聖人之起應之也非先
也

彖曰大哉乾元萬物資始乃統天雲行雨施品物流
形大明終始六位時成時乘六龍以御天乾道變化